

Vjesnici mubarek Ramazana

Dva mjeseca u hidžretskom kalendaru, redžeb i ša'ban, koja prethode najboljem od svih mjeseci, su svojevrsni vjesnici ali i opomena vjernicima da pripreme sebe, svoje duše za najbolje trenutke u cijeloj godini.

Šehri-Ramazan nikad ne dolazi bez prethodne najave, ali se u potpunosti i ne može iskoristi niti se njegove blagodati mogu osjetiti u svojoj punini bez prethodne pripreme. Naša priprema za Ramazan u ovim danima se može ogledati u sljedeća tri koraka ili djela:

1. Dobrovoljni post

Glavna odlika mjeseca Ramazana je obaveznost posta njegovih dana, taj post je farz, treći od pet islamskih šarti. U ovom mjesecu (ša'banu) je posebno lijepo i preporučeno dane provesti u dobrovoljnom - nafilu postu. Aiša, radijallahu anha, je rekla: „*Nisam vidjela Vjerovjesnika, sallallahu alejhi ve sellem, da je u potpunosti postio ijedan mjesec osim mjeseca ramazana, i nisam ga vidjela da je od dobrovoljnog posta postio više nego li u ša'banu.*“ (Buharija, Sahih, br. 1969)

Čestiti ashab Božijeg poslanika, Usama, radijallahu anhu, kaže da „*Poslanik, alejhiselam, ni u jednom drugom mjesecu, ukoliko se izuzme ramazan, nije postio onoliko koliko je postio u mjesecu ša'banu.*“

Dakle, Poslanik, alejhi selam, je dane mjeseca Ša'bana provodio u postu, što je jasan išaret onima koji njega slijede šta bi bilo lijepo, pohvalno i dobro da čine. Postom nekoliko dana ovog mjeseca pripremamo se za post cijelog Ramazana.

Ukoliko našu pažnju usmjerimo ka postu u ovom mjesecu, pokušajmo napraviti sintezu između pohvalnosti posta ovog mjeseca i odabranih dana u sedmici. Posebno je lijepo postiti ponedjeljkom i četvrtkom, a među razlozima te pohvalnosti su i riječi, Alejhsielama: „*Djela se predočavaju, uzdižu, svakog ponedjeljka i četvrtka, pa volim da se moje djelo predoči i uzdigne u trenucima dok sam postač.*“ (Imam Tirmizija, Sunen br. 747)

2. Čišćenje duše i činjenje dobra

Prethodno smo konstatovali da tijelo u predramazanskim danima čistimo postom, pripremajući ga za obavezni post, veoma je bitno da budemo svjesni nužne potrebe za čišćenjem duše, kako bi i ona čista i spremna dočekala mubarek Ramazan.

Duša se čisti istigfarom, traženjem oprost za učinjene grijeha, zatim izvinjenjem i traženjem halala za prijestupe u međuljudskim odnosima. Uzvišeni Allah je vjernike pozvao ka permanentnom traženju oprost riječima:

„*I svi se Allahu pokajte, o vjernici, da biste postigli ono što želite.*“ (En-Nur, 31)

Za pokajanje je uvjet iskrenost, a ne može doći do pokajanja bez razmišljanja i samoobračuna. Ovih dana nužna je potreba da svi razmišljajmo o sebi, svom ličnom samoobračunu i analizi postupaka. Razmislimo o riječima koje kazujemo, kakve li su one?, koliko su istinite, korisne i djelotvorne.

Razmislimo o djelima koje činimo, hoće li nam ta djela, a ona su ogledalo našeg vjerovanja, biti radost ili briga na Danu Sudnjem.

Radost će biti ukoliko su dozvoljena, iskrena i korisna društvu i zajednici u kojoj živimo, a briga će biti ukoliko su iz okruga zabranjenog, neiskrenog i štetnog za društvo i zajednicu u kojoj živimo.

Razmislimo o sebi, jer za sebe smo najviše odgovorni, kako bi Ramazan dočekali odlučniji u popravku i ličnom imanskom uzdizanju. Kur'an pažnju vjernika usmjerava i sljedećem životno važnom upustvu:

„...Činite dobro, da bi ste uspjeli, postigli ono što želite.“ (El-Hadž, 77)

Oba prethodno citirana ajeta završavaju se sa riječima, le'allekum tuflihun, *da bi ste uspjeli i postigli ono što želite*, čovjekov lični ali kolektivni uspjeh je vezan za dvije stvari pokajanje (samoobračun) i činjenje dobra. Čineći dobro, prije svega sebi pomažemo, jer onaj ko dobro čini u svoju korist ga čini, kao i onaj koji zlo čini, najprije ga sebi čini. Uvijek birajmo ono što je dobro za nas i društvo u kojem živimo.

3. Dova

Naš Gospodar nikada nije, niti će ikada prekršiti Svoje obećanje. Jedno od Njegovih obećanja je sadržano u kur'anskom ajetu: *“Gospodar vaš je rekao: ‘Pozovite Me i zamolite, Ja ću vam se odazvati!’”* (El-Mu'min, 60)

Pozovimo Ga kroz blagodat dove, za koju je rečeno: *„A kada te robovi Moji za Mene upitaju, Ja sam, sigurno, blizu: odazivam se molbi molitelja kad Me zamoli. Zato neka oni pozivu Mome udovolje i neka vjeruju u Mene, da bi bili na Pravome putu.“* (El-Bekare, 186.)

Iskoristimo dovu, skrušeno od Njega Milostivog zatražimo ono što nam je potrebno, u tim dovama sjetimo se naših merhuma, čestitih prethodnika, ali i narednih pokoljenja koja će biti ponosna na svoju vjeru, domovinu i zajednicu. Dova je prilika koja je veoma lijepo opisana riječima Božijeg poslanika: *“Vaš Gospodar je stidljiv i plemenit. Stidi se vratiti ruke Svoga roba prazne kada Ga zamoli u dovi.”* (Ebu Davud, Sunen, Tirmizija, Sunen)

Iskoristimo moć i blagodat dove, iskrenim riječima zamolimo Rabba da nas pripremi za berekete mjeseca Ramazana, da ga živi, zdravi i ustrajni na Uputi dočekamo u boljem stanju, sigurnijoj i spokojnijoj atmosferi – amin.

Asmir Bekrić

Preporod, br. 07/1185, 1. april 2021.